

## ■ AUTORITAD DA RECURS DAVART RADIO E TELEVISIUN

# Dals 26 recurs èn quatter vegnids approvads

**(cp) L'onn 2018 èn 26 recurs vegnids inoltrads a l'Autorità independenta davart radio e televisiun (AIRR/UBI). En il decurs da l'onn èn 27 proceduras vegnidas liquidadas. En quatter cas ha la AIRR constatà ina violaziun dal dretg da program. Quai resorta dal rapport annual ch'è cumpari en tuttas quatter linguas naziunales. 26 novs recurs èn entrads 2018 tar la AIRR. Ils posts da mediaziun da la SSR e dals emetturs privats, subordinads a l'autorità, han registrà en tut 485 reclamaziuns. Mo 5,4% da las reclamaziuns als posts da mediaziun èn vegnids tar la AIRR. Els posts da mediaziun han in'impurtanta funcziun da filtrar en la procedura da surveglianza davart ils cuntegns da las medias electronicas. Els n'han nagina cumpetenza da decider, mabain intermediéschan tranter ils participads.**

Dals novs 26 recurs inoltrads han 18 pertutgà la Svizra tudestga, sis la Romania e dus la Svizra italiana. 24 recurs èn sa drizzads cunter ils programs da la SSR, dus vers emetturs locals privats (Radio RaBe, Tele Top). Crititgadas èn surtut vegnidas novitads, emissiunadas da la televisiun, sco er autras emissiuns d'infurmaziun e da films documentars. En il focus èn stadas contribuziuns davart temas actuals da la politica da l'interiur ed exterior, uschia concernent la politica da l'Europa, asil ed energia, il dretg d'armas, l'armada secreta P-26 e la lavada da daners tschufs, *Donald Trump*, Catalogna u Brasilia.

Ils pli blers recurrents han reclamà ch'i sa tractia tar las emissiuns crititgadas da «Fake News», d'ina preschentaziun faussa u nuncumpletta da fatgs e d'ina reportascha unilateral, tendenziosa e nunequilibrada. Tar ils 27 recurs, vegnids liquidads l'onn passà ha la AIRR



constatà en quatter cas ina violaziun dal program. Ina contribuziun da l'emissiuon «HeuteMorgen» da radio SRF1 davart l'avegnir da l'energia ha cunterfatg a basa da calculaziuns intransparentas dals custs als principis d'infurmaziun da radio diffusiuon.

SRF n'ha betg menziunà en in artitgel online il fatg essenzial davart la «Affera Hildebrand» ch'ha motivà ina violaziun dal cumond d'esser objectiv. Medema-

main cunterfatg a quest cumond d'esser objectiv, ed uschelunsch sco applitgabel, er a quel da multifariadad ha ina contribuziun da Tele Züri, Telebärn e Tele e M1 curt avant la votaziun federala davart la refurma da rentas. Cun quest cumond d'objectivitat è in «Faktencheck» tendenzius dad SWI swissinfo.ch davart ina debatta en il cussegl naziunal pertutgant l'iniziativa «No Billag» na stà cumpatibel.

Naginas da las decisiuns menziunadas èn vegnidas contestadas dals emetturs pertutgads tar il Tribunal federal. Davart las mesiras prendidas tar violaziuns infurmeschan ils realisaders co els vulan evitar mancanzas ed uschia era violaziuns en l'avegnir. Las quatter proceduras han pudì vegnir liquidadas l'onn passà, siond che la AIRR ha taxà las disposiziuns prendidas sco suffizientas.

L'autorità da recurs independenta ha publictà ses rapport annual per 2018. Quel po vegnir retratg gratuitamain dal secretariat u stgargià giu da la website da l'autorità. Quella ha gì sutmess avant il rapport al cussegl federal. A quel ha ella da rapportar onn per onn.

La AIRR è ina cumissiun extraparlamentara da la confederaziun. Ella consista da nov commembers en uffizi accessorio e d'in secretariat da trais personas. Presidiada vegn quella cumissiun dapi l'entschatta da 2019 da l'avvocata e cussegliadra da comunicaziun *Mascha Santschi Kallay*. Ell'è successura da l'avvocat *Vincent Augustin*. La AIRR ha da constatar schè bain cuntegns d'emissiuons da radio e televisiun da realisatur svizzers u da la purschida publicistica supplementara da la SSR (offertas online, teletext etc.) han violà determinaziuns dal program tras il cuntegn da publicaziuns. Latiers valan sco principis d'observer: il cumond d'esser objectiv e multifar, la protecziun da la giuventetgna e dals dretgs fundamentals. Era da giuditgar ha la AIRR ina refusada cuntraria al dretg da l'access ad in program da radiodiffusiun u tar in'otra publicaziun. Las tractativas da la AIRR èn da princip publicas e la procedura gratuita per ils participads. Las decisiuns da la AIRR pon vegnir contestadas tar la Dretgira federala.